


Ўзбекистон Республикаси Мустақиллик куни — 1991 йил 1 сентябрдан чиқа бошлаган

Муассислар: Ўзбекистон Республикаси Хотин-қизлар қўмитаси, Болалар жамғармаси ва «Соғлом авлод учун» Халқаро жамғармаси

Эртанги кунимиз, ҳаётимизнинг фаровонлиги, замон талабларидан орқада қолмаслик, тараққий топган давлатлардан ва халқлардан кам бўлмаслик, бир сўз билан айтганда, истиқболимиз ва иқболимиз, барча эзгу ниятларимизнинг амалга оширилиши, биринчи навбатда, ўрнимизга келаётган ёш авлодни ҳар тарафлама етук инсонлар этиб вояга етказиш билан чамбарчас боғлиқ...

Ислом КАРИМОВ

ҲАЁТ МАЗМУНИ ФАРЗАНДЛАРИМИЗ КАМОЛИДА



А. МАВЛОНОВ сурати

Ёшлик ажиб бир сеҳру синоатга эга. Ундан узоклашганимиз сайин унинг қадрига, унинг қийматига кўпроқ етиб бораверимиз. Унинг қошига-унинг бағрига қанчалар қайтишни истамайлик афсус, бу истагимиз ижобат топмайди. Умр фаслларини табиат фаслларига менгзаймиз, ёшлигимизни баҳорга тенглаштириб мадҳ этамиз. Табиат фасллари умримиз давомида қошимизга қайтиб келавереди-ю, лекин ўтган умримиз фасллари қайтмайди. Лекин бундоқ жиддийроқ ўйлаб қарасак умр фаслларини қайта-қайта ҳис этиб яшаш учун Яратган Эгам бизга улкан имконият бериб қўйибди. Қандай имконият дейсизми? Ахир бизу сиз ота-онамиз, умр берса эрта-индин бо-бою буви ҳам бўламиз... Ҳар бир фарзандимиз билан қадамба-қадам унинг умрини бирга яшагандай бўламиз...

Унинг ҳаётда тўғри йўлини топиш, қоқилмаслиги, адашмаслигини жуда-жуда истаймиз. Фарзандимиз билан бирга бу дунёда яшашнинг асл мазмуни нимадалиги ҳақида баҳслашамиз, яна болалигимиз, ёшлигимизга қайтгандек бўламиз, яна ҳаётни бошидан бошлаётгандек ҳис қиламиз ўзимизни. Дил-дилдан истаймиз фарзандимиз биздан кўра доно-рок, ақлироқ, комилроқ бўлиб етишсин, биз кўрмаган довлардан ўтсин, биз ошмаган чўққиларни забт этсин. Қаранг, ота-она, бобо-буви бўлиш бу дунёда нақадар улуг саодат экан-болаликка қайтарканмиз, ёшликни қайтадан бошдан кечирарканмиз, навқиронлик, голиблик наъшу намосини қайтадан

ҳис этарканмиз... Ота-она бўлмоқ завку шуқуҳи, машаққату заҳмати билан этган Яратган Эгамга ҳамду санолар бўлсин...

Кишилик дунёси ярилибдики, у яратиш, кашф этиш ишига мубтало... Дунё инсоннинг ана шу яратиш-кашф этиш илмию ҳунаридан ривож топди, мукамаллашди. Инсониятнинг юксалиш-тараққиёти йўли эса чексиз-чегарасиздир.

Биз жондан азиз мамлакатимиз тараққий топишини, келажак авлодларимизга биздан озод ва обод Ватан қолишини истарканмиз, энг аввало фарзандларимизни билимли, ҳунарли қилиб вояга етказишни олдимиздаги биринчи вазифамиз деб билишимиз эътизим. Шу мақсадга эришиш учун мамлакатимизда кадрлар тайёрлаш Миллий дастури қабул қилинган ва шу асосда иш олиб борилмоқда. Айниқса, болаларга чуқур билим ва ҳунар ўргатувчи янгидан-янги коллежлар ташкил этиш, буларни мустаҳкамлаш кун тартибидagi зарур масалага айланган. Бугунги ўқув даргоҳи бундан 15-20 йил олдингиларидан кескин фарқ қилади. Ҳаёт ва замон шиддати, талаби шуни тақозо этади. Ҳукуратимиз ана шу мақсад учун куч ва маблағни аямай сарфламоқда.

Энг улуг ва энг азиз байрамимиз Мустақиллик кунидан кейин келадиган кун республикамизда Билимлар куни сифатида кенг нишонланади. Навқирон авлодимиз шу куни ўқув даргоҳлари томон кўтаринки кайфият, шоду хуррамлик билан йўл оладилар.

Мамлакатимиз Президенти Ислом Каримов 2 сентябр куни пойтахтимизнинг Акмал Икромов туманидаги қурилиш ва коммунал касб-ҳунар коллежининг тантанали очилиш маросимида қатнашди ва нутқ сўзлади.

Ҳам шаклан ва ҳам мазмунан замон талаблари даражасида қурилган бу коллеж 900 ўқувчига, 10 мутахассислик бўйича замонавий билим беришга мўлжалланган. "Тўлиқ замонавий ўқув жиҳозлари билан таъмирланган билим даргоҳимизнинг бошқа касб-ҳунар даргоҳларидан фарқи шундаки, дейди коллеж директори Аббосхон Хўжаев. У ҳар бир талабага камида 4 та ихтисослик бўйича билим беради: Талаба оддийгина сув таъминоти ва системалар устаси мутахассислигини эгалларкан қўшимча равишда чилангарлик, йиғувчилик, электр газ пайвандловчилик, ҳайдовчиликни ҳам ўрганади. Тўғри, касбларнинг ҳар бири ўзича мустақил бир соҳа, уларни эгаллаш осон кечмайди. Лекин замонавий синфхоналар, компьютерлар, билимдон устозу ўқитувчилар шоғирдларнинг билим эгаллашдаги машаққатини албатта енгиллаштиришга хизмат қилишади..."

"Бундай муҳташам биналар биз янги ҳаёт қириш йўлида астойдил қадам қўяётганимизни кўрсатади. Чунки бундай ўқув даргоҳини битириб, касб эгаллаган ёшлар кам бўлмайди, ҳаётдаги ўз мақсадига албатта етади", деди Президентимиз журналистлар саволларига жавоб бераркан...

3 сентябр куни яна бир тарихий нуқтаси воқеа содир бўлди. Ўзбекистон Республикаси Президентининг Фармонида кўра, Вазирлар Маҳкамаси ҳузурда ташкил этилган Тошкент Ислом Университетининг тантанали очилиш маросими бўлиб ўтди. Унда давлатимиз раҳбари Ислом Каримов иштирок этди ва нутқ сўзлади.

Тошкент Ислом Университети халқимизнинг муқаддас эътиқоди-Ислом динига оид маънавий-маданий меросимизни асраб-авайлаш, буюк ўтмишдошлар-

римизнинг асарларини, гоёларини, ўрганиш, таҳлил этиш, ривожлантириш, бу борада илмий-тадқиқотлар олиб бориш, халқимизнинг диний саводхонлигини оширишга хизмат қилишни кўзлайди.

Тошкент Ислом Университетининг очилиши мамлакатимиз ҳаётидагина эмас, балки бутун Ислом дунёсида катта аҳамиятга молик воқеа бўлди.

"Нима мақсадда бундай исломий билим маскани ташкил этилди?" деди Президентимиз. Бу саволга жавобни ўтган саккиз йил ичида ҳам сиёсий, ҳам иқтисодий соҳалардаги, авваламбор маънавият борасидаги амалий ишларимизда, ҳаётимиз қиёфасини, маъно-мазмунини мутлақо ўзгартираётган ислохотларда топиш мумкин. Миллий ва диний қадриятларимизни, маънавиятимизни қайта тикланаётган буюк аждодларимизнинг бебахо меросини рўёбга чиқариб, ўрганиб, татбиқ этаётган бир пайтимизда, навбат ушбу олий диний таълим даргоҳини таъсис этишга келди, десак ҳеч қандай муболага бўлмайди..."

Оққан дарё оқаверади... Бизнинг турли давру замонларда турли ном билан аталган муқаддас Ватанимиз дунё тараққиётига ҳамisha ўзининг муносиб ҳиссасини қўшиб келган, бундан кейин ҳам шундай бўлиши шак-шубҳасиздир. Тараққиёт-кашфиёт инсон илму ҳунари, инсон интилиши музлаштирилган бунёд топади. Мустақил Ўзбекистонда бугунги кунда Инсон камолоти кун тартибидagi бош масала экан, иншооллоҳу мақсадна-иятлар ўз ижобатини топқувсиз...

Дилбар САЙДОВА

МЕНИНГ ҚАДРИМГА ЭТАРМИКАН?

Ёшим 20 да. Ота-онам, синглим ва укаларим бор. Отам яхши жойда ишлайди. Тарбиямиз билан яхши шугулланади. Онам уй бекаси, келди-кетди, сигир-қўй дегандек эрталаб бизни кузатиб, кечкурун кутиб олади. Мен ўқишни битириб мана ишлаб юрганамга 3 йил бўлди, ишим яхши, ўзим ҳам фахрланаман.

Бир куни уйга совчилар келишди. Уйнинг энг катта қизи бўлгандан кейин келади-да, деди онам. Отам менга қараб: "Қизим катта бўлиб қолибди", - деди. Кейин у йигит билан учрашдим яхши гаплашдик. Мен унга ёқмадим. Бошқа уни кўрмадим. Лекин ҳафа бўлганим йўқ. Ҳали ёшман. Йигит ҳам кўнглимга унча тўғри келмаган эди. Фақат ота-онам биринчи эшикни фаришта очади, деб кўндириб қўйишган эдилар. Шу орада 2 йил ўтиб кетди. Совчилар ҳам келиб турди, у бўлди, бу бўлди тақдир бўлмади турмушга чиқмадим. Ҳеч ким билан гаплашмадим. Кўпчилиги сизни севиб қолдим, сизга уйланаман дерди. Лекин тўйдан олдин учрашиш ва йигит-қизлар орасида бўладиган нарсалардан қўрқардим. Шунинг учун рози бўлмасдим.

Бир куни кечроқ ишдан қайтдим. Отчет пайти эди. Уйга кетадиган бекатга қараб юрдим. Бекатда қўшни келиннинг укаси Дилмурод турган экан. Жуда яхши таниш бўлмасам ҳам саломлашиб турардик. Келиб унга салом бердим. У ҳам менга қараб салом деди. У билан гаплашдик. Кейин у машина тўхтатди, биз бирга кетдик. Йўлда у менга: "Сизни анчадан бери кузатиб юрибман", - деди. Ўзи яқинда ишга кирган экан. Ҳар куни эрталаб автобусга чиқасиз. Менга қарамай-сиз, - деди, мен кулиб нега энди ҳозир қарадим-ку, дедим, у ҳам кулди. Мен унга маҳаллангиз узоқ, ҳозир қандай уйга етиб борасиз дедим. У кулиб сиз кузатиб кўясиз деди.

Шундай қилиб ҳар куни эрталаб у билан бирга ишга кетадиган бўлдим, ҳатто кечкурун ишдан қайтишни кутиб турар эди. У жудаям олийжаноб ва оқ кўнгил йигит эди, мен учун. У мендан 4 ёш катта ва менга жуда ёқиб қолди. Дилмурод тўғрисида ҳар хил гаплар эшита бошладим. Олдин у уйланган ва у қиз икки ҳафта яшаб ўзи кетиб қолган экан. Фарзанд кўрибди. Боласи 2 ойлик бўлганда оламдан ўтган экан. Яна бир қиз билан гаплашиб орада анча-мунча жанжал гаплар бўлиб ўтган экан. Ўзим унча гап сўзларга ишонмайман ва биров-

нинг ҳам ғийбатини қилмаганман. Шунинг учун бу гапларга унча парво қилмадим. Ахир қарс бир қўлдан чиқмайди-ку. Мен эшитган гапларни ундан сўрамадим. Ўзи айтиб қолар дедим. Бир кун пайти бўлиб қолдим, у бошидан ўтган ҳаётини айтиб берди. У пайтлар кўп ичиб ота-онасига суяниб ёшлиқ қилиб қўйганини ва



ҚАНДАЙ ҚИЛСАМ УНИ УНУТАМАН

ҳозир умуман ичмаслигини, ҳаётда қандай яшаш керак эканлигини сўзлаб берди.

Менга қараб сиз ҳам эшитган бўлсангиз керак, деди. Мен унга бу гапларни ўзингиз айтишингизни кутардим, дедим. У менга севишини ва менга уйланмоқчи эканини айтди. Онамга сирларимни айтардим. Онам менга қизим ўзингизга ёқса, кўнглингизга тўғри келса бўлди, биз розимиз деди. Отам ҳам уларнинг оиласи яхши оила, ўғли адашган бўлса ёш бўлгандир. Бу дунёда ҳамма одам ўз жойини, тенгини топиши қийин деди.

Дилмуродни мен яхши томонларини кўриб, кўнгил қўйдим. Энди уни бир кун кўрмасам тўролмайман. Олдин хотин қўйган ва кўп қизлар билан бирга бўлган йигит мендек қизни ҳурмат қилиб бир умр турмуш қура олармикан, деб ўйлайман. Маслаҳат беринглар, ўз бахтимга эришиш учун нима қилишим керак.

НАРГИЗА, Тошкент

ЯРАТГАНДАН БАХТ СЎРАЙМАН

Аслида севгига ишонмасдим. Синфдошим билан гаплашиб юрардик. Муносабатларимиз ҳам яхши эди. Бир кун синфдошлар билан байрам кечаси ўтказишга келишдик ва ҳаммамиз йиғилишиб, бир боланикига бордик. Кечамиз яхши ўтди, ўғил болалар ичишди. Ниҳоят кечамизга яқун ясаб, уйга қайтдик. Йўлда у мени уйимгача кузатиб қўйишини айтди, лекин мен бунга кўнмадим, "ахир ўзинг ичгансан, кейин гаплашамиз", - дедим.

У барибир мен билан кетди. Шу куни у мени ўзи билан гаплашишга мажбур қилди. Ҳаётимда биринчи марта ўғил болалар билан гаплашишим эди, нима дейишни ҳам билмайман. У ҳадеб бир гапни айтарди!

"Сен меники бўлишинг керак", "Сени барибир тинч қўймайман".

Аслида мен унинг бу сўзларидан қўрққанымдан эмас, балки синфдошим-ку, у менга ёмонликни раво кўрмас, шунчалик севаркан деб ўйлаб, "майли бир ўйлаб кўраман", деб жавоб бердим. Шундан кейин ҳам 3-4 марта гаплашиб юрдик. Дастлаб унинг сўзлари мени ўзига қаратишга, унга бўйсунушимга мажбур қилаётгандек эди...

Хуллас, биз ҳали турмуш қурмасдан олдин ажрашиб кетдик. Нега? Бунга ҳануз тушунолмайман. Мен бундан ҳам йиғлайман, ҳам қувонаман. Йиғлашимга сабаб, бу дунёда мен энди бахтимни топаётгандай эдим. Фақат уни дер эдим, минг афсуски у гапларининг устидан чиқолмади.

Яқинда у яна олдимга келиб, муносабатларимизни давом эттиришимизни илтимос қилди. Мен эса, энди кеч, қалбимнинг синган парчалари тузалмаслигини, тузалганда ҳам дарз кетган ўрни қайта тикланмаслигини айтиб, унга рад жавобини бердим. Орадан 1 йил ўтгач, у яна олдимга келди. Бу орада у 2-3 қизнинг уйига совчи қўйган, лекин рад жавобини олганди. Мен узоқни ўйладимки, яна рад этдим. Унинг бу ҳаракатларига ҳечам тушунолмадим. Ёлғиз ҳамроҳим Оллоҳ. Фақат ҳаёл сураманки, менга ҳам Яратган тўлиқ бахт ато этармикан?

ШАБНАМ

Ёшим 18 да. Мен Тошкентдаги Олий даргоҳлардан бирида ўқийман. Бундан 3 йил олдин, мен Ш. исмли бир йигит билан танишиб қолдим. Кейинчалик бу танишув ва дўстлик покиза ва беғубор севгига айланди. Мен ўшанда севги сўзи қандай улуг бир сўз эканлигини тушунгандим. Мен усиз ҳаётимни тасаввур қила олмайман. У билан ҳар куни учрашар эдик. Мен ўзимни энг бахтли қиз деб ўйлардим. Ҳамма нарсани лекинни бўлганидек, Ш., хоразмлик эди. Уни ўқиши тугаб, Хоразмга кетди. У билан хат ёзишиб турардик. Ҳар 16 кунда мен ундан хат олардим. Ҳадеб хат келаверганидан онам шубҳаланиб, мени уришдилар, мен эса бу хат меники эмас, дугонамга ёзишди, унга олиб бориб бераман, - деб онамни ишонтирдим.

Ш. бир хатида мен ота-онамга бор гапни айтдим, улар Тошкентга келишиб, онангиз билан учрашмоқчилар, агар рози бўлишса, мен сизни Хоразмга олиб кетаман, деб ёзибди. Мен бу хатни ўқиб на хурсанд бўлишни ва на йиғлашни билмай қолдим. Мен оилада ёлғиз қизман. Отам бу

оламдан кўз юмганларига 10 йил бўлган. Оилада онам, мен, укам, бувам, бувим турамыз. Онам мени не умидлар билан худого шукур бировдан камчиликсиз, отамни йўқлигини билдирмай катта қияпдилар. Уларга қандай айтишга хайрон бўлиб қолдим. Бир куни бор кучимни тўглаб онамга айтдим. Лекин онам мени тушунмадилар. ... "Мени Хоразмга берадиган қизим йўқ, агар яна хат ёзишсанг сен мени қизим эмасан, менга ўз бошимча қиз керак эмас", - дедилар.

Аксига олиб у ҳам бир ўғил, уни ҳам не умидлар билан катта қияпдилар. Уни Тошкентга мени Хоразмга беришмайди. Ш. ни ота-онаси ҳам хат ёзишди. Лекин мен уларга ҳали ҳам жавоб қайтармадим. Энди нима қилишга хайронман. Мен олдиндан билгандим шундай бўлишини, онам тушунсалар керак деб ўйлагандим. Мен уни умидвор қилиб қўйдим. Мен усиз келажагимни тасаввур қила олмайман. Лекин онамни розиликларисиз у билан яшашни ҳохлаяман. Менга маслаҳат беринглар, илтимос!... Уни унутишга ёрдам беринглар!

МАФТУНА, Тошкент

Оила ва жамият

Мақолада келтирилган фактлар, воқеалар, маълумотлар учун муаллиф жавобгар ҳисобланади.

Муаллиф фикри таҳририят нуқтаи назаридан фарқ қилиши мумкин.

Кўлөзмалар таҳлил қилинмайди ва муаллифларга қайтарилмайди.

БОШ МУҲАРРИР: ДИЛБАР САИДОВА

Телефонлар:
Бош муҳаррир — 133-28-20
Котибият — 34-86-91

МАНЗИЛИМИЗ:
Тошкент - 700000
Амир Темур кўчаси,
1-тор кўча, 2-уй.

«Шарқ» нашриёт-матбаа концерни босмаҳонаси.
Манзил: Тошкент, Буюк Турон кўчаси, 41-уй.
Босишга топшириш вақти - 20.35
Босишга топширилди - 21.15

ХОМИЙ «Матбуот тарқатувчи» акциядорлик жамияти

ОБУНА ИНДЕКСИ - {яққа обуначилар учун 176
ташкилотлар учун 177

Рўйхатга олиш № 33
Буюртма Г-0558
33625 нусхада чоп этилди.
Формати А-3, ҳажми 2 босма тобоқ.
Баҳоси эркин нарҳда.
Расом — Н. ХОЛМУРОДОВ.
Навбатчи — Н. ЙҮЛДОШЕВА.